



Ina rosa sin la loipa

Per la 20avla cursa da dunnas dal maraton da skis en s'annunziadas 1000 curriduras.

13



südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Dil clima, l'uiara ed il nutriment

DA HANS HUONDER / ANR

■ Per la fin da lur temps da scola al gimnasi han las maturandas ed ils maturands era da scriver ina lavur da matura. Quell'incarica han rondond 40 scolaras e scolar dal gimnasi dalla claustra da Mustér giu quest onn da scola. Dacuort ei ina part da quellas lavurs vegnida presentada el gimnasi a Mustér. Geniturs, fargliuns, enconuschents ed amitgs han nezegiau la caschun da tedlar e veser tgei temas che las maturandas ed ils maturands han eligiu per lur lavurs ch'han stuiu vegnir inoltradas gia igl atun vargau. La Quotidiana presenta empau pli detagliadamein entginas da quellas lavurs da scolaras. En quellas vegnan ils pli differents temas tractai: L'istoria cuorta, il nutriment vegan, igl effect dil clima sin la cresta da crap, il toc musical Elias da Felix Mendelssohn, igl effect dalla polluziun dalla glisch sin carstgauns ed animals ni era perdetgas dalla vischnaunca da Trun dil temps dalla Secunda Uira mundiala.

> PAGINA 5

Sfidas futuras dalla politica agrara

Il cussegl federal ha mess en consultaziun il concept per la politica agrara 2022+

DA MARTIN CABALZAR

■ Cun la politica 2022+ vul il cussegl federal migliorar las cundiziuns da basa dalla politica agrara ellas spartas fiera, menaschi ed ambient. La finamira ei da dar all'agricultura dapli autonomia e da promover il spért d'inteprendider. Cun la politica agrara suenter 2022 (AP22+) persequitescha il cussegl federal il principi «dapli responsabladad, dapli confidanza e dapli simplificaziuns». Per che l'economia agrara e da victualias sappi agir cun success silla fiera internaziunala ston las resursas vegnir nezegiadas a moda efficienta cun el medem mument era prender risguard digl ambient. Per quei intent duein las cundiziuns da rom dall'agricultura vegnir svilupadas vinavon sin plaun politic cunzun sils secturs fiera, menaschi ed ambient. Supplementarmentein vul la nova politica agrara s'orientar dapli viers la fiera, nezegiar ils potenzials d'inteprendider, rinforzar l'atgna responsabladad dil pur e promover l'inziativa ed innovaziun privata. In'orientaziun consequenta sils basegns dalla fiera duei pur-



L'agricultura cun ses survetschs multifunzionali ha vinavon ina grond'impurtonza per la Svizra.

MAD

tar dapli recav era cun nezegiar meglier las sinergias denter fiera e persistenza. Sil sector da menaschi vul la confederaziun rinforzar tier la puraglia il spért d'inteprendider e migliorar l'effi-

ciencia dil singul menaschi cun risguardar el medem mument las stucturas multifaras dils menaschis purils e respectar las resursas naturalas. Per saver realisar las finamiras tschentadas vul

la confederaziun metter a disposiziun pils onns 2022-2025 summa summarum 13,915 milliardas.

> COMMENTARI E PAGINA 3

■ COMMENTARI

Agricultura denter massa e marti

DA MARTIN CABALZAR

Cun ses survetschs multifars e multifunzionali ei l'agricultura svizra vinavon ina ferma petga pil beinstar e beinesser dalla Svizra. Ella proveda buca mo la populaziun cun vivonda d'aula qualitat, ella tgira era la cuntrada e contribuescha al manteniment dallas resursas naturalas e garantiescha la coloniasaziun decentrala. Per las regiuns muntagnardas ei l'agricultura schizun da muntada existenziala. Risguardond sia eminenta funcziun publica ei in sustegn finanziel substanzial dil stadi giustificau.

A schia procura il stadi per favoreivlas cundiziuns per la produziun e la vendita da products agrars. Plinavon remunerescha el las prestaziuns dall'agricultura per la tgira dalla cuntrada ed en favur dil cuminetel cun pagaments directs. Sut quei tetel sustegn el era il nez persistent dallas resursas naturalas ed ina produziun adattada agl animal. La confederaziun ha denton era l'incumbensa da procurar per in svilup socialmeins cumporteivel e promover la perscrutaziun scientifica e la cussegliazion. Ella regla era la protecciun dalla flora ed il diever dils mieds da produziun. E quei tut lai ella custar bunamein quater milliardas ad onn.

Emalgrad quei sustegnivan ils purs buc ella tiarra dalla cucagna. Lur dis da lavur ein savens liungs e lur lavur magari stentusa. Enstagl da saver esser veritabels purs suverans ed inteprendiders vegnan els denton degradai adina dapli a hortulans e cunzun a birolists. Per saver ademplier tut las pretensiuns statalas ston els impunder bia temps e gnarva. La politica agrara ei oz in veritabel spessom da paragrafs cumpliacai. Profitar profiteschan buca mo ils purs, ina buna part sespiarda la finala en birocrazia ed en menaschis posteriors. Denton era il mistregn indigen profitescha. Las subvenziuns agraras han pia numerus profitunzs.

martin.cabalzar@somedia.ch

Laud e critica

Il parlament dad Ilanz/Glion insista sin dapli sforzs

■ (anr/abc) Mesjamna sera ha il parlament communal dad Ilanz/Glion refusau il rapport e la proposta dalla suprastanza communal pertuccont l'examinaziun dils pensums communs. El decuors dil 2018 ei l'administraziun communal stada confruntada cul squetsch rigurus da spargnar, finamira eis ei stau da migliorar la situaziun finanziaria.

Ell'administraziun han ins controllau mintg'expensa. Mesjamna havess il parlament duui prender notizia dil rapport che la suprastanza communal ha fatg surlunder e dess liber da realisar las ulteriuras mesiras. Tonpli che la suprastanza communal ha saviu far al parlament ina comunicaziun legrevla. Sco la presidenta communal Carmelia Maissen ha

annunziou muossa il resultat provisoric dil quen communal 2018 cefras ner. Quel ei bia megliers che spitgaus, el siara cun in cash flow da 2,7 milliuns francs ed in gudogn net dad 1,5 milliuns francs. Malgrad quei ha il parlament buca renconuschiu ils sforzs. El pretenda dapli.

> PAGINA 2



Sacha Zala (a sanestra) discorra cun il cusseglier federal Ignazio Cassis. FOTO TWITTER/VS. ZALA

Il Premi grischun da cultura 2019 vegn surdà a Sacha Zala

■ (cc) La regenza ha surdà il Premi grischun da cultura 2019 a l'istoricher Sacha Zala da Brusio per ses engaschament per segirar e per promover la lingua taliana. Sco president ha el renovà e professionalisà l'organizaziun linguistica e culturala Pro Grigioni Italiano. Sia lavur sco perscrutader da renum nazional ed internaziunal è marcada d'in cor che

batta profundamain per il Grischun talian e ch'al timunescha da cumbatter instancablmain per la lingua taliana. Il premi è dotà cun 30 000 francs. Plinavant ha la regenza surdà nov Premis da renconuschientscha e set Premis da promoziun da mintgamai 20 000 francs.

> PAGINA 22

Il parlament dad Ilanz/Glion giaviescha che la suprastanza examinieschi aunc meglier las proceduras da lavur dils survetschs ed ufficis communs.

FOTO A. BEULI



50006

Servetsch d'abunents e da distribuziun: tel. 0844 226 226 mail: abo@somedia.ch

Premis da renconuschientscha 2019

Jürg Conzett (1956), inschigner da construcziun, Tumein/Cuira

La regenza surdat a *Jürg Conzett* da Tumein/Cuira in Premi da renconuschientscha. L'inschigner da construcziun ha stgaffi punts innovativas ed ha marcà – ensemen cun ses partenari *Gian Franco Bronzini* – la cultura architectonica dal Grischun.

ensemble z, sis musicistas dal Grischun e da la vischinanza

La regenza surdat a l'ensemble z in Premi da renconuschientscha. Sut la direziun dad *Ursina Brun* èn las sis musicistas dapi l'onn 2000 en gir en il Grischun e fascineschan in grond public cun lur musica.

Manfred Ferrari (1963), reschissur e directur da teater, Cuira

La regenza surdat a *Manfred Ferrari* da Cuira in Premi da renconuschientscha. Il reschissur ha realisà ina retscha d'inscenaziuns impressiunantas ed ha dà la tempra a la Postremise da Cuira ch'è daventada – pervia da ses engaschament duravel e pervia da ses caracter

scharmant – in lieu da scuntrada culturala apprezzà.

Pascal Gamboni (1977), musicist, Sedrun/Berna

La regenza surdat a *Pascal Gamboni* in Premi da renconuschientscha. Il musicist ha chattà in sound che sa basa sin simpladad, profunditad e forza.

Paul Grimm (1947), istoricher, Ftan

La regenza surdat a *Paul Eugen Grimm* da Ftan in Premi da renconuschientscha. L'istoricher ha scrit publicaziuns decisivas per l'istorgia da l'Engiadina Bassa.

Ute Haferburg (1961), directura da teater, Fläsch

La regenza surdat ad *Ute Haferburg* da Fläsch in Premi da renconuschientscha. La dramaturga ha enritgì – cun grond inschign artistic – il teater en il Grischun cun aria internaziunala.

Rico Stecher (1971), paleontolog/magister, Cuira

La regenza surdat a *Rico Stecher* da Cuira in Premi da renconuschien-

tscha. Il magister ha sviluppà – grazia a ses interess per fossils – ina gronda savida da la paleontologia ed ha chattà in saur sgulant ch'era fin ussa nunconuschent.

Bettina Wachter (1967), artista, Zezas

La regenza surdat a *Bettina Wachter* da Zezas in Premi da renconuschientscha. L'artista figurativa stgaffescha in'ovra plastica independenta ord blatgas, materialias natiralas e poliester.

Gian Andrea Walther (1945) ed Ivana Semadeni Walther (1951), intermediurs culturals, Promontogno

La regenza surdat a *Gian Andrea Walther* ed ad *Ivana Semadeni Walther* da Promontogno in Premi da renconuschientscha. Las duas persunalitads generusas ed interpendentas èn activas sin ils champs da la musica e da la perscrutaziun sco er sco archivaris e promoturs da la cultura ed han influenzà plainamain ed en moda fitg variada tut la scena culturala da la Bregaglia durant passa 40 onns.

Premis da promoziun 2019

Donat Caduff (1982), autur/graficher, Sagogn/Turitg

La regenza surdat a *Donat Caduff* in Premi da promoziun per sias lavurs sco autur davart maletgs da vitgs grischuns.

Andrin Caviezel (1984), fisicher, Lantsch/Tavau

La regenza surdat ad *Andrin Caviezel* da Tavau in premi da promoziun per sia savida sco fisicher che studegia la fluidinamica.

Mattiu Defuns (1998), musicist, Trun

La regenza surdat al musicist *Mattiu Defuns* in Premi da promoziun per ses

curaschi e per sias abilitads da concentrar – sco giuvenil – tut sias forzas sin la musica.

Lea Hew (1989), designra da moda, Vaz sut

La regenza surdat a *Lea Hew* in Premi da promoziun per sias abilitads sco designra da moda e per sia obstinaziun d'avair success sco interpredidra.

Madlaina Janett (1985), musicista e grafica, Turitg e Tschlin

La regenza surdat a *Madlaina Janett* in Premi da promoziun per sias abilitads sco musicista tar ils Fränzlis da Tschlin

e per ses engaschi sco organisatura d'emnas da musica.

Jaromir Kreiliger (1991), fotograf, Castrisch/Vienna

La regenza surdat a *Jaromir Kreiliger* in Premi da promoziun per ses purtretts fotografics commovents d'umans e da cuntradas.

Martin Roth (1990), chantadur, Cuira/Turitg

La regenza surdat a *Martin Roth* in Premi da promoziun per ses inschign empermettent sco bariton.

Ils premis vegnan surdads en il rom d'ina festa ch'ha lieu sonda, ils 29 da zercladur 2019 a las 13.15 a Brusio.

Cundiziuns pli fidadas per la forza idraulica svizra

■ (cc) La regenza ha preni posiziun tar in project da consultaziun dal Departament federal per ambient, traffic, energia e comunicaziun (Datec). Cun las midadas previsas da la lescha davart il provediment d'electricitad vul il cussegl federal adattar il martgà d'electricitad per garantir a lunga vista la segirezza dal provediment, per augmentar l'effizienz economica e per rinforzar l'integraziun da las energias regenerablas en il martgà. En spezial prevesa el d'avrir cumpletamain il martgà d'electricitad.

Il chantun Grischun, sco commember da la conferenza da las regenzas dals chantuns alpines (CRCA), sustegna la posiziun da quella pertutgant la midada prevista dal cussegl federal da la lescha davart il provediment d'electricitad. La regenza è pia dal medem avis sco la CRCA che l'avertura cumpletta dal martgà d'electricitad svizzer servia da princip a la segirezza dal provediment d'electricitad, sch'i vegnan resguardadas cundiziuns generalas gistas en la concorrenza e sch'i vegnan considerads ils differents interess. Ma ella giuditgescha actualmain

che questas cundiziuns generalas na sajan anc betg fixadas en moda uschè fidada sco quai ch'ellas stuessan esser per in provediment d'electricitad en Svizra segir a lunga vista, favuraivel, ecologic e responsabel.

La forza idraulica è en Svizra – e pia er en il chantun Grischun – il purtader d'energia indigen il pli impurtant per producir electricitad. Ella gida indispensablmain e vastamain a garantir la segirezza dal provediment d'electricitad a favur da la societad e da l'economia en Svizra. En sia posiziun a la confederaziun pretenda la regenza perquai cunzunt er cundiziuns generalas pli fidadas che tegnan quint adequatamain da la gronda impurtanza e da la gronda valur da la forza idraulica svizra per la politica da provediment, per l'economia e per l'ecologia. Questas cundiziuns duain gidar a lunga vista a garantir la segirezza da planisaziun e d'investiziun da la forza idraulica svizra ed – en moda pli segira – particularmain er sia disponibladad per ils proxims onns.

Consultaziun dal Departament federal per ambient, traffic, energia e comunicaziun (Datec).



La meglieraziun da Luzern vegn sustegnida dal chantun.

MAD

Sustegn per la meglieraziun da Luzern

■ (cc) Per las lavurs da la meglieraziun generala da Luzern vegn concedida ina contribuziun chantunala da maximalmain 6,9 milliuns francs. Questa contribuziun dal chantun pre-

metta ina contribuziun finanziala da la confederaziun che sustegna il project cun circa 9,67 milliuns francs. Il territori dal project cumpi- gna ina surfatscha da 1296 hectaras.